

REGIONAL NEWS

HEADLINES:-

1. Mizo tlawmngai pawl lian ber YMA Day vawi 90-na pualin vawiin khan branch hrang hrang ten hun an hmang .
2. Sorkar laipui hmalakna - PMAY-G hnuaiah insak tanpuina dawngtu chu Mizoramah chhungkaw sing 2 sang 6 leh 966 an awm tawh.
3. Directorate General of Civil Aviation (DGCA) chuan India rama hman mek Boeing 787 thlawhna 34 endik hna a pawtsei tih Union Civil Aviation Minister K Ram Mohan Naidu chuan a sawi.
4. Vawiina NEET UG 2025 medical Entrance result chhuakah Rajasthan atangin Mahesh Kumar chu pakhatna a ni.

<><><>

YMA DAY 2025

Mizo tlawmngai pawl lian ber YMA Day vawi 90-na pualin vawiin khan branch hrang hrang ten hun an hmang a. Chief Minister Pu Lalduhoma chuan a bial chhung khua Neihloh Branch a hman pui a, khawvel hmun hrang hranga awm YMA member zawng zawngte YMA Day chibai a buk.

Chief Minister chuan, YMA chu a din tirh phat atangin tanpui ngaite tanpuitu, zofate tana pawl tangkai leh zahawm a la ni reng a ti a. A hlutna a hniam thei lo a, mi thenkhatten YMA ropuizia an la hmu fiah lo a nih chuan lungngaihna leh harsatna an tawh niah an la hmu ngei ang, a ti. An fel vang emaw an that vang emaw ni lovin Zofa an nihna vang ringawtin YMA hian a la tuamhlawm dawn a. An dam laia a tuamhlawm ta lo a nih pawhin an ruang tal chu zah takin thlanmualah a phum ngei ang, a ti bawk.

Pu Lalduhoma chuan, tun hnuaiah ruahpui vangin chhiatna Mizoramin a tuar nasa tih sawiin, chhiatna thlenna apianga tanpuitu langsar ber chu YMA te an ni a ti. An tanpuina dawngtu, a bikin hnam dangten nasa takin an lawmna thu social media lamah an rawn pho chhuak a. Mizo min tihmingtha em em a ni, a ti.

Ram leh hnam din chhuahna tur chu thawk chhuak tam nih a ngai tih a sawi a, hnam dangte mamawh pe thei khawpa san a ngai tih sawiin chu dinhmun thleng tur chuan YMA member ten hmathlir fel tak neia hna an thawh a ngai a. Mizoram siamtha tur hian hnam dangte an rawn kal dawn lo va, tu leh fate rawn tih atana dah chi pawh a ni lo a. Tuna awm mek te chu a ti theitu an ni tih a sawi.

YMA Day hi June ni 15 a ni a, kuminah chuan Pathianni a nih avangin branch hrang hrang ten anmahni remchan hunah an hmang. Branch tam tak chuan vawin hian an hmang a, tanpui ngai tanpui nan te, khawtlang tih fai hnatlang neih nan te, thing phun nan te, intihhlamna leh infuih tharna hun atan te an hmang hlawm a ni.

<><><>

CYMA PRESIDENT

Central YMA President Pu Lalhmachhuana'n YMA member zawng zawngte leh Zohnahthlak unau zawng zawngte YMA Day Chibai bukin YMA chu pawl ropui tak leh thianghlim a nih ang ngeiin YMA-ah theihtawp chhuaha tan la thar leh turin YMA member zawng zawngte a chah.

Kumin YMA Day puala thuchah a sawiah CYMA President chuan, YMA chu Mizoram chhung chauh ni lo, India ram zau zawk pawh hriat a hlawh hle a ti a, Ram tana thil tha tih hi chhunzawm zel tur leh YMA ten lawmman beisei vang nilovin, ram leh hnam tan hma la zel turin a chah bawh.

Pu Lalhmachhuana chuan YMA chu tlawmngai pawl pakhat mai ni lo hnam inngahna lungphum, Mizote phuarkhawmtu, a tul ang zela Ram leh Hnam tana ke pen thin a ni a ti a. Thlei bik a nei lova, a te ber atanga a lian ber thleng hian angkhat in YMA chuan a hrut rual vek a ti a, Mizoten YMA an nei chu an vanneih pui tih sawiin hnamdangin an awt hle a ti a, Tunlai thangthar zingah YMA hlutna hrefiah zo lo awm palh thei a ni tih sawiin a tul ang zel a inhrilhfiah a pawimawh tih a sawi bawh.

Central YMA President chuan YMA chu a bul tantute atanga tun thlengin hma a la sawn zel a ti a, YMA member Nuai 5 an tling tawh tih sawiin Group YMA 50, Sub Headquarters 8 leh Branch 821 a awm ta chu a bul tantute, YMA hruaitute leh member, veng tin leh khaw tina tanlatute avang a ni, a ti a. YMA dinna leh inngahna, 'Tanpui ngaite tanpui' kawngah ke an pen zel tih sawiin Central YMA chuan Home/Centre leh Damdawiin hrang hrang bakah zoram pawna Mizo Welfare hrang hrang te ah an luangchhuak tih sawiin Sub-Hqrs YMA leh Group YMA te pawhin an mahni huamchhung ah theuh chanhai leh tanpui ngaite tan an luang chhuak leh thei te chu YMA hlutna tizualtu a ni tih a sawi bawh.

<><><>

RAILWAY SAFETY AWARENESS CAMPAIGN

Wawiinah khan Sairang Village Council Gram Sabha hun hmanna-ah Mizorama Rel lo lut hnai mai tur a nih avangin, mipui mimir ten fimkhurna chang hriat tawh loh avanga Rel kawnga chetsualna a thlen loh nan 'Railway Safety Awareness Campaign' neih a ni.

He Awareness campaign-ah SDC Pu Samuel Malsawmzuala, Sairang Police OC Pu Lalngaihawma, Asstt.Executive Engineer NF Railway Pu Partha Pratima Das leh Sr. Section Engineer Pu Ganesh Langthasa ten Sairang mipui te hnenah mipui himna atana hriattur pawimawh an zirtir

Tluang takin he hun hi hman a ni a, mipui pawh thahnem tak an pung khawm a ni.

<><><>

INTERNATIONAL DAY OF YOGA

Khawvel hmun dangte ang bawkin Mizoramah pawh hlawk thlak takin Yoga kalpui mek a ni a, a bik takin infiammite tan a tangkai hle.

Akashvani zawhna chhangin, Mizoram Sports and Youth Services hnuaia Yoga Instructress Pi Lalhlimpuii Tohhawng chuan, Yoga chu infiammi te tan a tangkai tih a sawi a, infiammi mai bakah taksa hriselna atan mitin tan a pawimawh tih a sawi bawk.

Mizoram sorkar hnuaia infiamna huangah Yoga zirtirtu pakhat a awm a, ani hian Taekwondo, Volleyball leh Boxing ten coaching an kal zawh hnuaia Yoga a tih pui thin. Infiammi te bakah hian Damna In, Peace Home leh Observation Home-ah te Yoga hi a kalpui thin bawk a ni.

United Nations (UN) chuan kum 2014 khan khawvel puma hman turin International Day of Yoga hi a pawm a, June ni 21-ah hman thin niin, kuminah pawh hman a ni leh ang.

<><><>

PMAY-G

Sorkar laipui hmalakna - Pradhan Mantri Awaas Yojana - Gramin (PMAY-G) hnuaiah insak tanpuina dawngtu chu Mizoramah chhungkaw sing 2 sang 6 leh 966 an awm tawh.

Thingtlang mirethei in sak tanpuina dawng zinga chhungkaw sing 2 leh 5011 zaa 83.46 chuan in an sa zo tawh. Lunglei district-a tanpuina dawng te chu sa zo hnem ber niin, an zingah za zela 98.51-in sa zo tawh a ni.

PMAY-G hnuaia in sak tanpuina dawng turte hi Socio Economic Caste Census 2011 (SECC) data atanga thlan a ni a, PMAY-G hi sorkar kum 2016-17 atanga hman a nih chauh avangin SECC 2011 survey hun laia beneficiary-te chu in tha nei tawh te, pêm tawh te, thi tawh leh in tha mamawh si list-a chuang ve lo tam tak an awm tih hmuh chhuah a ni. Hei vang hian kum 2018 khan Ministry of Rural Development chuan SECC 2011 survey list-a awm ve lo, in tha mamawh site tan Awaas+Survey a kalpui leh bawk.

Rural Development (RD) department hotute chuan in sak tanpuina atan sorkar laipui atangin sum an hmuh that tih an sawi a, tunah hian State Nodal Account atangin sum hman zawh tawh ni mah se, ministry atangin cheng vaibelchhe 12.9475 dawn tawh a ni a, sorkar Treasury-ah la awm mekin, sum dawn a nih veleh tanpuina sem leh thuai beisei a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

TREE PLANTATION

Lairam Isua Krista Baptist Kohhran, Central Thalai Pawl chuan Environment humhalh nan kum nga chhungin Thing tiak 10,000 (Singkhat) phun a enkawlzui tura ruahmanna an siam chu an kalpui mek a, tun dinhmunah Thingtiak 5000 vel an phun tawh a, kum 2027 ral hmain Thigtiak singkhat phun hman an tum.

Lairam Isua Krista Baptist Kohhran chuan Environment humhalhna lam hawi inzirtir nan Green Sunday an hman thin chu kum 2019 atang khan hlawk zawka hman a nih theih nan June thla Inrinni vawi hnihna chu Green Saturday ti a vuahin, kumtin Thingtiak phun nan an hmang thin a.

LIKBK Thalai Pawl ten Environment humhalh nana hmalakna peng pakhat atan Thing phun beihpui an thlak mek chu vawiin Green Saturday hian chhunzawmin, Lawngtlai leh a chhehvel bakah Sangau Tlangdungah te vawiin khan Thingtiak 1200 chuang an phun.

Lawngtlai khawpui chhunga Thalai Pawl UNit hrang hrang te chuan National Highway-02 (Lawngtlai leh Lunglei inkar, Lawngtlai District huamchhung kawngpui kamah Thing tiak hi an phun.

Tun dinhmunah LIKBK hnuaiah hian Thalai Pawl Unit 120 awmin Member singkhat vel an awm mek.

<><><>

DGCA

Directorate General of Civil Aviation (DGCA) chuan India rama hman mek Boeing 787 thlawhna 34 endik hna a pawtsei tih Union Civil Aviation Minister K Ram Mohan Naidu chuan a sawi. Pu Naidu sawidanin thlawhna pariat chu endik zawh tawh a ni a. Hei bakah hian mithiam tak tak awmna high-level committee te din anih thu sawiin he committee hian thlawhna chetsual dan chhui mek chu an vil dawn a ti a. He committee ah hian Union Home Secretary chu Chairman anih thu a sawi a ni.

<><><>

NEET

Vawiin khan Medical Entrance atan NEET UG 2025 result tihchhuah a ni a. National Testing Agency (NTA) Website ntaneet.nic.in ah en theih a ni.

NEET hi kumin May ni 4 khan buatsaih a ni a, candidate nuai 22 chuang awmin centre 5400 chuangah an exam a. Ramchhung khawpui 552 leh rampawn khawpui 14 ah exam hi neih a ni a. A pumpuiah Rajasthan atangin Mahesh Kumar chu pakhatna a ni a. Madhya Pradesh atangin Uttkarsh Awadhiya leh Maharastra atangin Krishang Joshi te chu pahnihna leh pathumna an ni.

<><><>

PM

Prime Minister Narendra Modia chuan ni nga thangin Cyprus,Canada leh Croatia te naktuk hian a pan dawn. A hmasa berah Cyprus President Nikos Christodoulides sawmna angin Cyprus a tlawh ang a. Hei hi kum 20 hnua Prime Minister in Cyrus a tlawh leh hmasak ber a ni a. Hemi hnu hian Pu Modia hian Canada leh Croatia a pan leh dawn a ni. Canada Prime Minister Mark Carney sawmna angin G-7 Summit ah a tel ang.

<><><>

ISREAL AND IRAN

Iran chuan Israel chhangletin vawiin khan tum engezat a kap a. Iran missile te hian Israel khawpui Tel Aviv nasa takin an kap a ni. Iran missile kah avang hian Israel ah mi 3 an thi a, midang engemawzatin hliam an tuar a ni.

<><><>